



REPUBLIKA E SHQIPËRISË

KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE
DREJTORIA E PËRGJITHSHME PËR TË DREJTËN E INFORMIMIT
DREJTORIA E VLERËSIMIT TË ANKESAVE

Nr. 1320/2 Prot

Tiranë, më 20/8/2021

VENDIM

Nr. 40, datë 20.8.2021

PËR

URDHËRIMIN E AUTORITETIT PUBLIK

Në mbështetje të nenit 23 të Kushtetutës së Republikës së Shqipërisë, pikës 3 dhe 5 të nenit 24, të ligjit nr. 119/2014 “Për të drejtën e informimit”, shkronjës a) të nenit 31/1 të ligjit nr. 9887 datë 10.03.2008 “Për mbrojtjen e të dhënave personale” i ndryshuar,

KONSTATOVA SE:

Ankuesja znj. _____, ka depozituar pranë Zyrës së Komisionerit për të Drejtën e Informimit dhe Mbrojtjen e të Dhënave Personale (në vijim “Komisioneri”) Formularin e Ankesës nr. 1320 Prot., datë 02.08.2021, me objekt “*Ankim ndaj refuzimit për dhënie informacioni dhe kopje të dokumenteve zyrtare*”, kundër Autoritetit Publik “Ministria e Turizmit dhe Mjedisit” (në vijim “Autoriteti Publik”).

Ankuesja, në cilësinë e kërkueses, nëpërmjet shkresës datë 08.07.2021, ka kërkuar t’i vihet në dispozicion dokumentacioni, në lidhje me:

1. *Raportin për vlerësimin e ndikimit në mjedis, (përmbledhjen jo teknike), për projektin “HEC Thirrë”, që do të realizohet nga subjekti, “Sang 1” sh.p.k, me NUIS L52414501C, për të cilin është miratuar VNM Nr. 349 Prot., datë 21.02.2017. Ky raport është paraqitur nga subjekti zhvillues në momentin e aplikimit për t’u pajisur me VNM paraprake nga Agjencia Kombëtare e Mjedisit.*

Në mungesë të një përgjigje nga ana e Autoritetit Publik, me pretendimin se është cenuar në të drejtën për informim, ankuesja ka paraqitur ankim pranë Komisionerit, duke i kërkuar ushtrimin e kompetencave që i njeh ligji për rastet e refuzimit të dhënies së informacionit.

Zyra e Komisionerit pas shqyrtimit paraprak të ankesës, bazës ligjore dhe rrethanave të faktit të paraqitura në të, vlerësoi se ankesa përmbush kriteret formale ligjore, në përputhje me përcaktimet e nenit 24 të ligjit nr. 119/2014 “Për të drejtën e informimit” (në vijim “LDI”).

Në ndjekje të procedurës për shqyrtimin administrativ të çështjes, në përputhje me nenin 10 të ligjit nr. 44/2015 “Kodi i Procedurave Administrative i Republikës së Shqipërisë”, i cili parashikon: “*Organi publik siguron që të gjitha palët dhe persona të tjerë të përfshirë në procedurë të jenë në gjendje të ndjekin dhe të mbrojnë të drejtat dhe interesat e tyre ligjore në mënyrë sa më efektive dhe të lehtë të jetë e mundur*”, Komisioneri, me shkresën nr. 1320/1 prot., datë 04.08.2021 ka kërkuar nga Autoriteti Publik të informohet mbi trajtimin apo procedurën e ndjekur lidhur me kërkesën për informacion, brenda datës 11.08.2021.

Me kalimin e afatit të përcaktuar më sipër, nga ana e Autoritetit Publik nuk pati reagim apo të merrej ndonjë masë për vënien në dispozicion të dokumentacionit të kërkuar.

Pas konsultimit të legjislationit përkatës dhe dokumentacionit bashkëlidhur ankesës, Komisioneri vlerëson se, informacioni i kërkuar *Raportin për vlerësimin e ndikimit në mjedis, (përmbledhjen jo teknike), për projektin “HEC Thirrë”, të miratuar me VNM Nr.349 Prot., datë 21.02.2017, në bazë të Ligjit Nr. 10440, Datë 07.07.2011, “Për vlerësimin e Ndikimit në Mjedis” i ndryshuar dhe Vendimit të Këshillit të Ministrave Nr.686, datë 29.7.2015 “Për miratimin e rregullave, të përgjegjësive e të afateve për zhvillimin e procedurës së vlerësimit të ndikimit në mjedis (VNM) dhe procedurës së transferimit të vendimit e deklaratës mjedisore”, disponohet nga Autoriteti Publik.*

Gjithashtu, Komisionerit vlerëson se, dokumentacionit i kërkuar në parim përmbush kërkesat e pikës 2, të nenit 2, të ligjit nr. 119/2014 “Për të drejtën e informimit”, sipas të cilit “*informacion publik konsiderohet çdo e dhënë e regjistruar në çfarëdo lloj forme dhe formati, gjatë ushtrimit të funksionit publik pavarësisht nëse është përpiluar ose jo nga Autoriteti Publik*”. Në këtë kuptim, Autoriteti Publik duhet të vendosë në dispozicion të kërkuarit çdo informacion/dokument i cili është prodhuar ose mbahet nga ky i fundit në formën e disponuar.

Autoriteti Publik për vënien në dispozicion të i dokumentacionit të kërkuar duhet të mbajë në konsideratë parashikimin sipas pikës 6 të nenit 17 të LDI, sipas të cilit: “*Nëse kufizimi prek vetëm një pjesë të informacionit të kërkuar, pjesa tjetër nuk i refuzohet kërkuarit. Autoriteti Publik tregon qartë pjesët e dokumentacionit përkatës që janë refuzuar, si dhe në bazë të cilës pikë të këtij neni është bërë ky refuzim*”.

Në pikën 3 të nenit 3 të LDI, “*Çdo person ka të drejtë të njihet me informacionin publik, nëpërmjet dokumentit origjinal ose duke marrë një kopje të tij në formën ose formatin që mundëson akses të plotë në përmbajtjen e dokumentacionit*”.

Bazuar në nenin 15 të po këtij ligji, “autoriteti publik trajton kërkesën për informim brenda 10 ditëve pune nga data e dorëzimit të saj”. Ndërkohë në pikën 1, të nenit 18 parashikohet se mosrespektimi i dispozitave të këtij ligji, passjell përgjegjësi administrative. Në pikën 2, të nenit 18 parashikohet se veprimet dhe mosveprimet, në përputhje me këtë ligj dhe për aq sa nuk përbëjnë vepër penale konsiderohen kundërvajtje administrative dhe dënohen me gjobë personat përgjegjës.

E drejta për informim është një prej të drejtave themelore të njeriut, e parashikuar në nenin 23 të Kushtetutës së Republikës së Shqipërisë. Kjo e drejtë duhet parë e lidhur ngushtë me parimin e transparencës dhe llogaridhënies, si një shtyllë tjetër themelore e shtetit të së drejtës. Funksionimi i tyre do të ishte në interesin e të dy palëve.

PËR KËTO ARSYE

Bazuar në shkronjat b) dhe ç) të pikës 5 të nenit 24, nenit 25 të ligjit nr. 119/2014 “Për të drejtën e informimit”, shkronjën a) të pikës 1 të nenit 18 të ligjit nr. 49/2012 “Për organizimin dhe funksionimin e gjykatave administrative dhe gjykimin e mosmarrëveshjeve administrative” i ndryshuar,

V E N D O S A:

1. Pranimin e ankesës nr. 1320 Prot., datë 02.08.2021 nga znj. _____, kundër Autoritetit Publik “Ministria e Turizmit dhe Mjedisit”, me objekt “Ankim ndaj refuzimit për dhënie informacioni dhe kopje të dokumenteve zyrtare”.
2. Urdhërimin e Autoritetit Publik, për vënien në dispozicion të dokumentacionit sipas kërkesës për informacion datë 08.07.2021, duke respektuar kufizimet, në përputhje me pikën 6 të nenit 17 të ligjit nr. 119/2014 “Për të drejtën e informimit”, konkretisht: Raportin për vlerësimin e ndikimit në mjedis, (përmbledhjen jo teknike), për projektin “HEC Thirrë”, që do të realizohet nga subjekti, “Sang 1” sh.p.k., me NUIS L52414501C, për të cilin është miratuar VNM Nr. 349 Prot., datë 21.02.2017, brenda datës 27 . 8 .2021.
3. Kundër këtij vendimi palët kanë të drejtën e ankimit në Gjykatën Administrative Tiranë, brenda 45 ditëve nga marrja dijeni, sipas nenit 25 të ligjit nr. 119/2014 “Për të drejtën e informimit”.
4. Ky vendim u shpall sot në datë 20 . 8 .2021.

